



Nefndasvið Alþingis
nefndasvid@althingi.is

Kópavogi 14. maí 2020.

Efni: Frumvarp til laga um breytingu á lögum um sjúkratryggingar, nr. 112/2008, með síðari breytingum (stjórn og eftirlit), 701. mál, stjórnarfrumvarp.

Við er til tölvubréfs Alþingis frá 30. apríl 2020 þar sem óskað er álits Læknafélags Íslands (LÍ) á frumvarpi til laga um breytingu á lögum um sjúkratryggingar, nr. 112/2008, með síðari breytingum (stjórn og eftirlit), 701. mál á 150. löggjafarþingi.

Drög að umræddu frumvarpi voru í byrjun árs kynnt í samráðsgátt stjórnvalda. LÍ sendi þá umsögn um drögin með bréfi til heilbrigðisráðherra dags. 6. febrúar 2020.

Við yfirferð frumvarpsins sést glögglega að ráðuneytið hefur að nokkru tekið tillit til athugasemda sem bárust í samráðsgáttina.

Í frumvarpinu eru nú lagðar til þrjár meginbreytingar á lögum um sjúkratryggingar:

1. Að fella niður það hlutverk stjórnar Sjúkratrygginga Íslands að hún geri tillögu til ráðherra varðandi ráðningu forstjóra, sbr. 1. gr. frumvarpsins.
2. Að tryggja eftirlitsheimildir SÍ þegar greiðslur til þjónustuveitenda byggjast á gjaldskrá sem stofnunin setur, í þeim tilvikum þegar ekki er í gildi samningur milli Sjúkratrygginga og þjónustusveitenda, sbr. 2. gr. frumvarpsins.
3. Að heimila SÍ vegna eftirlits að kalla eftir afriti hluta sjúkraskrár sjúklinga frá læknum og öðrum heilbrigðisstarfsmönnum í stað þess að þurfa áfram að koma á starfsstofur þeirra og skoða sjúkraskrárnar þar, sbr. 3. gr. frumvarpsins.

Stjórn LÍ telur ástæðulaust að draga stjórnina algerlega úr ráðningarferlinu. T.d. mætti segja að ráðherra skuli afla umsagnar stjórnar um umsækjendur um starf forstjóra. Þá leggst stjórn LÍ ekki gegn þeirri rýmkun sem felst í 2. gr. frumvarpsins, þ.e. að eftirlitsheimildir SÍ nái einnig til þess þegar sjúkratryggðum er veitt heilbrigðisþjónusta á grundvelli gjaldskrár þar sem samningar eru ekki fyrir hendi. Stjórn LÍ leggst hins vegar eindregið gegn því að heimilað verði að SÍ geti fengið send til sín afrit sjúkraskráa þjónustuþega vegna eftirlitshlutverks stofnunarinnar. Engin haldbær rök eru færð fyrir þeirri breytingu. Núverandi fyrirkomulag sem felst í því að starfsmenn SÍ fara á starfsstofur og hafa aðgang að sjúkraskrá hefur gefist vel. Aðgangur að sjúkraskrá er í eðli sínu mjög takmarkaður og það á ekki án mjög brýnna ástæðna

að veita heimild til þess að senda hluta sjúkraskrár til stofnana eins og SÍ. Stjórn LÍ sér engar slíkar brýnar ástæður vera hér til staðar.

Verði eftir því óskað er LÍ að sjálfsögðu tilbúið til að senda fulltrúa félagsins á fund velferðarnefndar til að ræða frumvarpið.

Virðingarfyllst,
f.h. stjórnar LÍ,



Reynir Arngrímsson, formaður



Nefndasvið Alþingis
nefndasvid@althingi.is

Kópavogi, 14. maí 2020.

Vísað er til tölvupósts Nefndasviðs Alþingis frá 30. apríl sl. þar sem óskað er umsagnar Læknafélags Reykjavíkur (LR) um frumvarp til laga um sjúkratryggingar (stjórn og eftirlit), 701. mál á 150. löggjafarþingi.

Drög að umræddu frumvarpi voru í byrjun árs kynnt í samráðsgátt stjórnvalda. LR sendi umsögn um drögin með bréfi til heilbrigðisráðherra dags. 6. febrúar 2020.

Ljóst er að ráðuneytið hefur að nokkru tekið tillit til athugasemda sem bárust í samráðsgáttina. Þannig er ekki lengur fyrirhugað að leggja niður stjórn Sjúkratrygginga Íslands og er það vel. Eftir standa breytingar sem ætlað er að tryggja að SÍ geti haft eftirlit með þjónustuveitendum sem fá greitt á grundvelli gjaldskrár. Sömuleiðis er haldið til streitu að freista þess að heilbrigðisstarfsmenn megi, vegna eftirlits SÍ, senda stofnuninni afrit af þeim hluta sjúkraskrár, sem SÍ telur nauðsynlegt.

Stjórn LR hefur eftirfarandi athugasemdir við frumvarpið í þeirri mynd sem það er lagt fram á Alþingi af hálfu heilbrigðisráðherra:

- 1. gr. frumvarpsins breytir 1. mgr. 7. gr. laganna** í þá veru að ráðning forstjóra skuli ekki vera að fenginni tillögu stjórnar SÍ. Stjórn SÍ virðist því ekki eiga að koma að ráðningu forstjóra. LR telur fulla ástæðu til að stjórn SÍ komi að ráðningu forstjóra með tillögu eða umsögn. Þá telur LR ýmsir kostir geti verið við það að ráðherra sé að jafnaði bundinn af tillögu eða umsögn stjórnar.
- 2. gr. frumvarpsins breytir 1. mgr. 45. gr. laganna** þannig að við málsgreinina bætast tveir nýir málslíðir um skyldu SÍ til eftirlits með starfsemi þjónustuveitenda sem þiggja greiðslur á grundvelli gjaldskrár sem SÍ setur samkvæmt 38. gr. laganna. Hér eru því lagðar til breytingar til að tryggja að eftirlitsheimildir SÍ viðhaldist þegar sjúkratryggðum er veitt heilbrigðisþjónusta á grundvelli gjaldskrár þar sem samningar eru ekki fyrir hendi. LR gerir enga athugasemd við að eftirlitsheimildir SÍ verði rýmkaðar með þessum hætti.
- 3. gr. frumvarpsins breytir 46. gr. laganna.** Hér er lögð til sú breyting að vegna eftirlits geti starfsmenn Sjúkratrygginga Íslands kallað eftir að heilbrigðisstarfsmenn sendi stofnuninni hluta sjúkraskrár sjúklings sem eftirlit nær til í stað þess að þurfa að fara á starfsstofu sjálfstætt starfandi heilbrigðisstarfsmanns eins og nú er gert ráð fyrir. Í athugasemdum segir að þessi breyting sé lögð til “til þess að unnt sé að sinna eftirliti með skilvirkari hætti”. Ekki er gerð nein tilraun til að útskýra að hvaða leyti gildandi fyrirkomulag geri eftirlitið óskilvirkara. Stjórn LR gerir alvarlega athugasemd við þessa fyrirhuguðu breytingu og leggst eindregið gegn henni. Stjórnin telur að núverandi fyrirkomulag hafi gefist vel og það hafi tryggt með fullnægjandi hætti það eftirlit sem stofnunin ákveður að grípa til hverju sinni. Heilbrigðisstarfsmaður og annar starfsmaður á vegum stofnunarinnar hafa, í þeim tilvikum sem það hefur verið talið nauðsynlegt, komið á starfsstofur og fengið aðgang að sjúkraskrá sjúklings í þeim mæli sem eftirlitið kallar á.

Þetta tryggir að aðgangurinn að sjúkraskrá verður aldrei meiri en þörf krefur. Með því að skylda heilbrigðisstarfsmenn til að senda stofnuninni afrit þess hluta sjúkraskrár, sem talin er þörf á hverju sinni er hætt við að kallað verði eftir stærri hluta sjúkraskrár en minni. Sjúkraskrár eiga að vistast hjá þjónustuveitanda og það á að vera algjör undantekning að afrit séu send af sjúkraskrá. Afrit sjúkraskráa á ekki að fara víðar en ítrasta þörf krefur. Þá dregur stjórn LR í efa að það samræmist meginreglum laga um persónuvernd að aðili eins og Sjúkratryggingar Íslands safni hluta sjúkraskráa með þeim hætti sem breytingin gerir ráð fyrir. Stjórn LR leggur til að ekki verði fallist á þær breytingar á lögnum sem 3. gr. frumvarpsins leggur til.

Stjórn LR er tilbúin að koma til fundar hjá velferðarnefnd Alþingis vegna þessa máls.

Virðingarfyllst,
Fh. Læknafélags Reykjavíkur

A handwritten signature in dark ink, appearing to be 'Þórarinn Guðnason', written in a cursive style.

Þórarinn Guðnason, formaður.

Alþingi
b.t. velferðarnefndar

Reykjavík, 28. maí 2020
Tilvísun: 2020041524/VEL

Efni: Umsögn um frumvarp til laga um breytingu á lögum um sjúkratryggingar nr. 112/2008, með síðari breytingum (stjórn og eftirlit).

Persónuvernd vísar til beiðni velferðarnefndar Alþingis frá 30. apríl 2020 um umsögn um frumvarp til laga um breytingu á lögum nr. 112/2008, um sjúkratryggingar (pskj. 1183, 701. mál á 150. löggjafarþingi).

Með 3. gr. frumvarpsins er lagt til að 46. gr. laganna verði breytt á þann veg að læknum og hlutaðeigandi heilbrigðisstarfsmönnum sjúkratryggingastofnunarinnar verði gert heimilt að *kalla eftir* þeim hluta sjúkraskrár sem nauðsynlegt er vegna eftirlits með samningum og reikningsgerð á hendur stofnuninni. Samkvæmt 46. gr., eins og hún er nú, er sömu aðilum heimilt að *skoða* viðkomandi hluta sjúkraskrár og *skal skoðun fara fram á þeim stað þar sem sjúkraskrá er varðveitt*.

Persónuvernd vekur athygli á eftirfarandi:

1.

Vinnsla viðkvæmra persónuupplýsinga, eins og hér um ræðir, þarf að byggjast á heimild í 9. gr. laga nr. 90/2018, um persónuvernd og vinnslu persónuupplýsinga, og enn fremur styðjast við eitthvert þeirra skilyrða sem í 11. gr. laganna greinir. Hvað varðar þá vinnslu persónuupplýsinga sem felst í að kalla eftir upplýsingum úr sjúkraskrá koma helst til skoðunar 3. og 5. töluliðir 9. gr. og 7. og 9. töluliðir 11. gr. laganna.

Í 7. og 9. töluliðum 11. gr. laga nr. 90/2018 er kveðið á um að vinnsla viðkvæmra persónuupplýsinga geti verið heimil ef hún er *nauðsynleg* í tilgreindum tilgangi og *fari hún fram á grundvelli laga sem kveða á um viðeigandi og sértækar ráðstafanir til að vernda grundvallarréttindi og hagsmuni hins skráða*.

Persónuvernd bendir á að hvorki í frumvarpinu né í gildandi lögum nr. 112/2008 er að finna ákvæði um ráðstafanir til að vernda grundvallarréttindi og hagsmuni hins skráða hvað varðar vinnslu viðkvæmra persónuupplýsinga hjá sjúkratryggingastofnuninni.



2.

Í athugasemdum um 3. gr. frumvarpsins er vikið að öryggisráðstöfunum við umrædda vinnslu persónuupplýsinga. Samkvæmt þeim athugasemdum virðast öryggisráðstafanir fela í sér aðgangsstýringu að umræddum upplýsingum. Með hliðsjón af fyrirhugaðri aðgangsstýringu segir að heilbrigðisstarfsmaður geti þannig sent gögn með öruggum hætti til sjúkratryggingastofnunarinnar.

Persónuvernd áréttar mikilvægi þess að gætt sé að öryggi persónuupplýsinga og skyldum ábyrgðaraðila, þ.e. sjúkratryggingastofnunar í þessu tilviki, í því sambandi, samkvæmt 24. og 25. gr. reglugerðarinnar (ESB) 2016/69, sbr. 23. gr. laga nr. 90/2018. Þær skyldur fela meðal annars í sér að gætt skuli að lágmörkun gagna og að gerðar skuli tæknilegar og skipulagslegar ráðstafanir til að tryggja að sjálfgæfið sé að einungis séu unnar þær persónuupplýsingar sem nauðsynlegar eru vegna tilgangs vinnslunnar hverju sinni. Það á við um það hversu miklum persónuupplýsingum er safnað, að hvaða marki unnið er með þær, hversu lengi þær eru varðveittar og aðgang að þeim.

Í 32. gr. reglugerðarinnar (ESB) 2016/679, sbr. 27. gr. laga nr. 90/2018, eru nánari ákvæði um viðeigandi tæknilegar og skipulagslegar öryggisráðstafanir. Með hliðsjón af því að til stendur að kalla eftir viðkvæmum persónuupplýsingum í gegnum vefgátt vekur Persónuvernd athygli á b-lið 1. mgr. 32. gr. sem kveður á um að tryggja skuli, eftir því sem við á, viðvarandi trúnað, samfellu, tiltækileika og álagssþol vinnslukerfa og -þjónustu.

Í þessu sambandi er rétt að nefna að nú stendur yfir úttekt Persónuverndar á öryggi persónuupplýsinga hjá sjúkratryggingastofnuninni.

3.

Persónuvernd vekur einnig athygli á því að þar sem fyrirhugað er að afla viðkvæmra persónuupplýsinga frá þriðja aðila í gegnum vefgátt getur verið tilefni til að láta fara fram mat á áhrifum á persónuvernd sem hluta af almennu áhrifamati í tengslum við umrædda lagasetningu, sbr. 10. töluliður 35. gr. persónuverndarreglugerðar (ESB) 2016/679, sbr. 29. gr. laga nr. 90/2018. Ef það er ekki gert þyrfti sjúkratryggingastofnunin að huga að því að láta fara fram mat á áhrifum fyrirhugaðra vinnsluadgerða samkvæmt 35. gr. persónuverndarreglugerðar (ESB) 2016/679, sbr. 29. gr. laga nr. 90/2018 og auglýsing nr. 828/2019, um skrá yfir vinnsluadgerðir sem krefjast ávallt mats á áhrifum persónuvernd.

Ekki eru að öðru leyti gerðar athugasemdir við efni frumvarpsins. Verði frekari umsagnar óskað um einstök atriði verður hún fúslega veitt.

F.h. Persónuverndar,


Vigdís Eva Línal


Valborg Steingrimsdóttir

Reykjavík, 14. maí 2020

Nefndasvið Alþingis
b.t. velferðarnefndar
Austurstræti 8–10
101 Reykjavík
nefndasvid@althingi.is

Efni: Umsögn um frumvarp til laga um breytingu á lögum um sjúkratryggingar, nr. 112/2008, með síðari breytingum (stjórn og eftirlit).

Hinn 26. mars sl. lagði heilbrigðisráðherra fram á Alþingi frumvarp til laga um breytingu á lögum um sjúkratryggingar, nr. 112/2008, með síðari breytingum (þskj. 1183 í 701. máli). Frumvarpið gekk til velferðarnefndar að fyrstu umræðu lokinni hinn 24. apríl sl. Frumvarpið hefur verið yfirfarið á vettvangi SH – Samtaka heilbrigðisfyrirtækja.

Rétt er að benda á að SH veittu umsögn um drög að frumvarpinu þegar það var í opnu samráði á samráðsgátt stjórnvalda, Ísland.is. Við það tilefni voru áform um niðurlagningu stjórnar sjúkratryggingarstofnunarinnar gagnrýnd. Þá var jafnframt vakin athygli á álitamálum sem annars vegar kynnu að skapast vegna áforma um skilyrði fyrir beingreiðslum til þjónustuveitenda f.h. notenda og áforma um að heimila sjúkratryggingastofnuninni að kalla eftir hluta af sjúkraskrár þjónustuviðtakenda í eftirlitsskyni. Var í þessu tilliti m.a. vakin athygli á nokkrum ákvæðum persónuverndarlaga og bókhaldslaga. Leyfðu SH sér að leggja til að óskað yrði umsagnar Persónuverndar og atvinnuvega- og nýsköpunarráðuneytisins um frumvarpsdrögin áður en lengra yrði haldið.

Það frumvarp sem nú liggur fyrir er nokkuð einfaldara að efni til en frumvarpsdrögin sem sett voru í opið samráð. Í því er nú að finna eftirfarandi meginatriði:

1. Lagt er til að ráðherra skipi forstjóra sjúkratryggingarstofnunarinnar án þess að stjórn stofnunarinnar geri um það tillögu.
2. Lagt er til að sjúkratryggingastofnuninni verði fengnar heimildir til að annast eftirlit með þjónustuveitendum vegna heilbrigðisþjónustu utan samninga. Í því felst m.a. heimild stofnunarinnar til að kalla eftir þeim hluta sjúkraskrár sem nauðsynlegt er vegna eftirlits með samningum og reikningsgerð á hendur stofnuninni og eftirlitið fari þannig ekki fram á þeim stað þar sem sjúkraskrá er varðveitt.

Stjórn

Í 5. kafla greinargerðar frumvarpsins er tekið fram að ákvæði um að afnema stjórn sjúkratryggingarstofnunarinnar hafi verið tekið út og einungis lagt til að stjórnin hafi ekki lögbundið hlutverk við skipun forstjóra.

Virðist gagnrýni umsagnaraðila þannig hafa verið tekin til greina og er það afar jákvætt.

Beingreiðslufyrirkomulag

Í áðurnefndum 5. kafla er jafnframt gerð grein fyrir því að ákveðið hafi verið að fjarlægja ákvæði sem heimila átti sjúkratryggingastofnuninni að greiða kostnað sjúkratryggðs beint til þjónustusveitanda.

Í þessu samhengi er rétt að taka fram að SH fögnuðu beingreiðslufyrirkomulaginu en bentu á tiltekin atriði sem þyrftu að taka til nánari skoðunar áður en frumvarpið yrði lagt fram í endanlegum búi. Tóku þau fram að fyrirkomulagið gæti dregið úr samfélagslegum kostnaði. Sætir það furðu að ákveðið hafi verið að falla frá áformunum.

Aðgangur að sjúkraskrá

Eins og áður segir bentu SH í opna samráðinu á álitamál sem tengjast áformum um að heimila sjúkratryggingastofnuninni að kalla eftir hluta sjúkraskrár vegna eftirlits með samningum og reikningsgerð. Þannig bentu samtökin á að þær meginreglur sem hafa um langt skeið verið hornsteinar persónuverndarlöggjafarinnar í tengslum við vinnslu persónuupplýsinga séu lögmætisreglan, tilgangsreglan, meðalhöfsreglan, áreiðanleikareglan og varðveislureglan. Upplýstu samtökin að meginreglurnar kölluðu ekki aðeins á að tekin væri ígrunduð afstaða til miðlunar og annarrar vinnslu persónuupplýsinga í lagatexta heldur yrði löggjafinn að taka mótaða afstöðu til vinnsluheimilda við lagasetningu.

Í greinargerð frumvarpsins eru nú veittar eftirfarandi skýringar:

Í lögum um sjúkratryggingar er gert ráð fyrir að við eftirlit fari fulltrúar sjúkratryggingastofnunarinnar á þann stað þar sem sjúkraskrá er varðveitt til að skoða þann hluta sem nauðsynlegt er að yfirfara vegna eftirlits. Verklagið hefur tafið og komið í veg fyrir að stofnunin geti sinnt eftirlitshlutverki sínu með góðum hætti.

Í stað þess að skoðun fari fram á þeim stað þar sem sjúkraskrá er varðveitt er lagt til í frumvarpinu að stofnunin geti kallað eftir nauðsynlegum hluta sjúkraskrár. Um er að ræða breytingu á verklagi sem eykur skilvirkni og öryggi. Sjúkratryggingastofnunin hefur útbúið örugga leið fyrir heilbrigðisstarfsmenn til að senda þau gögn sem eru nauðsynleg þegar eftirlit fer ekki fram á starfsstöð. Sending gagna mun fara fram í gegnum sérstaka vefgátt sem lýtur strangri aðgangsstýringu þar sem aðgangsheimild er tengd kennitölu heilbrigðisstarfsmanns. Heilbrigðisstarfsmaður getur þannig sent gögn með öruggum hætti til sjúkratryggingastofnunarinnar. Aðeins starfsmenn stofnunarinnar, sem hafa heimildir til að skoða umrædd gögn, munu hafa aðgang að þeim. Með þessu verklagi er tryggt að skilyrði laga um persónuvernd og vinnslu persónuupplýsinga, nr. 90/2018, séu uppfyllt, þ.e. að gögnin séu aðeins aðgengileg þeim aðilum sem hafa heimildir til að vinna með þau.

(Undirstrikun SH)

Í greinargerð frumvarpsins er ekki tekið fram að leitað hafi verið eftir umsögn Persónuverndar um efni þessa þáttar frumvarpsins. Af þeim sökum leyfa samtökin sér að taka hér að hluta upp umfjöllun úr umsögninni sem veitt var í opna samráðinu.

Upplýsingar í sjúkraskrá teljast jafnan viðkvæmar persónuupplýsingar skv. 3. tölul. 3. gr. laga um persónuvernd og vinnslu persónuupplýsinga, nr. 90/2018. Í 2. gr. laga um sjúkraskrár, nr. 55/2009, er eftirfarandi áréttað sérstaklega:

Við færslu og varðveislu sjúkraskráa og aðgang að þeim skal mannhelgi og sjálfsákvörðunarréttur sjúklinga virtur, þess gætt að sjúkraskrár hafa að geyma viðkvæmar persónuupplýsingar og að sjúkraskrárupplýsingar eru trúnaðarmál.

Til grundvallar liggja rök sem komu fram í sérstökum athugasemdum við 2. gr. frumvarps þess er varð að lögum nr. 55/2009. Þar segir:

Í greininni eru undirstrikuð þau meginsjónarmið sem hafa ber í huga við færslu og varðveislu sjúkraskráa og aðgang að þeim en samkvæmt ákvæðinu skal mannhelgi og sjálfsákvörðunarréttur sjúklinga virtur og þess gætt að sjúkraskrár hafa að geyma viðkvæmar persónuupplýsingar og að sjúkraskrárupplýsingar eru trúnaðarmál. Við túlkun á hugtakinu mannhelgi ber að líta til þess hvernig það er notað annars vegar í lögum um réttindi sjúklinga, sbr. 1. og 17. gr. þeirra laga, en jafnframt í 5. gr. mannréttindasáttmála Evrópu, sbr. lög nr. 62/1994. Er hugtakið jafnframt nátengt hugtakinu sjálfsákvörðunarréttur sjúklinga sem einnig er notað í ákvæðinu og vísar til þeirrar grundvallarreglu að sjúklingar eigi að meginstefnu að ráða því sjálfir hvort og þá hvaða heilbrigðisþjónustu þeir þiggja og þá jafnframt hvernig farið er með bær upplýsingar sem safnað er um þá við veitingu þjónustunnar. Hvað sjúkraskrár varðar lýtur þessi réttur að því að sjúklingur eigi að geta haft áhrif á það hverjir hafi aðgang að sjúkraskrárupplýsingum um hann og með hvaða hætti. Ákvæði sem varða sjálfsákvörðunarrétt sjúklinga er að finna víða í frumvarpinu, svo sem í 7., 13., 19. og 21. gr. Loks ber að hafa það í huga við alla vinnslu sjúkraskrárupplýsinga að þær teljast viðkvæmar persónuupplýsingar og að þær eru trúnaðarmál. Er hér vísað til þess trúnaðarsambands sem ríkja skal á milli sjúklings og heilbrigðisstarfsmanns og þeirrar þagnarskyldu sem ávallt hvílir á heilbrigðisstarfsmanni um upplýsingar um sjúklinga sem hann kemst að í starfi sínu.


(Undirstrikun samtakanna)

Í framangreindu samhengi er rétt að benda á að meðalhófsreglan krefst þess m.a. að löggjafinn framkvæmi hagsmunamat og komist að niðurstöðu um hvaða hagsmunir vegi svo þungt að þeir réttlæti lögbundið inngrip í svo viðkvæmar persónuupplýsingar sem sjúkraskrár eru. Má ætla að þar vegist á hagsmunir sjúkratryggingastofnunarinnar af aðgangi að sjúkraskrá og hagsmunir sjúklinga af því hið minnsta að hafa eitthvað um þann aðgang að segja, þ.e. skilvirkt eftirlit og sjálfsákvörðunarréttur sjúklings.

Á vefsíðu þingmálsins er tekið fram að óskað hafi verið umsagnar Persónuverndar um málið. Ætla verður að sú stofnun sé í bestum færum við að leggja mat á álitamálið. Allt að einu skora SH á velferðarnefnd að huga sérstaklega að framangreindum ábendingum að teknu tilliti til mögulegrar umsagnar Persónuverndar.

Virðingarfyllst,

f.h. SH – Samtaka heilbrigðisfyrirtækja

A handwritten signature in black ink, reading "Jón Gauti Jónsson". The signature is written in a cursive style with a horizontal line drawn through the middle of the letters.

Jón Gauti Jónsson, formaður



Sjúkratryggingar
Íslands

Velferðarnefnd,
Nefndarsviði Alþingis,
B/t Sigrúnar Helgu Sigurjónsdóttur ritara.

Reykjavík 13. maí 2020.

Sjúkratryggingar Íslands hafa fengið til umsagnar frumvarp til breytinga á lögum nr. 112/2008 um sjúkratryggingar, þingskjal 1183 – mál 701.

Sjúkratryggingar Íslands fagna framkomu þessa frumvarps en vilja þó leyfa sér að gera eftirfarandi tillögu að breytingu á a) lið 3. gr. frumvarpsins.

Liðurinn hljóðar nú þannig:

- a) Í stað orðanna „skoða þann“ í 2. málsl. kemur: kalla eftir þeim

Lagt er til að honum verði breytt þannig:

- a) Í stað orðanna „skoða þann“ í 2. málsl. kemur: skoða eða kalla eftir þeim

Rök fyrir þessari breytingu eru þau, að eins og liðurinn er orðaður í lögunum í dag er viðeigandi starfsmönnum SÍ, er þeir sinna eftirliti sínu, gert að fara á starfsstöðvar viðkomandi veitanda heilbrigðisþjónustu, eða þann stað þar sem sjúkraskrá er að finna, til að sinna því eftirliti. Með þeirri breytingu sem lögð er til í frumvarpi því sem hér er til umræðu er ákvæðinu breytt þannig að SÍ geti kallað eftir þessum gögnum. Breytingu þessa má misskilja þannig að ekki verði þá lengur heimild til að skoða viðkomandi hluta sjúkraskrár þegar verið er að sinna eftirliti og vilja SÍ gera framangreinda breytingu til að tryggja að báðir möguleikar séu til staðar, þ.e. bæði að skoða þann hluta sjúkraskrár sem nauðsynlegt er á starfsstofu viðkomandi og eins að kalla eftir þessum upplýsingum.

Að öðru leyti leggja SÍ til að frumvarpið verði samþykkt.

Fh. Sjúkratrygginga Íslands.

Baldvin Hafsteinsson hrl.
aðstoðarmaður forstjóra



Tannlæknafélag Íslands

Icelandic Dental Association

Alþingi
Velferðarnefnd
150 Reykjavík

Reykjavík, 14. maí 2020

Umsögn Tannlæknafélags Íslands um frumvarp til laga um sjúkratryggingar (stjórn og eftirlit), 701. mál

Stjórn Tannlæknafélags Íslands (TFÍ) hefur fjallað um frumvarp til laga um breytingu á lögum nr. 112/2008 sem bárust félaginu frá nefndarsviði Alþingis þann 30. apríl sl. og hefur eftirfarandi athugasemd:

3. gr – Aðgengi að gögnum

TFÍ getur ekki fallist á ótakmarkaða heimild sjúkratryggingastofnunar til að kalla eftir gögnum sérstaklega þar sem tannlæknar hafa ekki aðgang að vefgátt sem sending mun fara fram í gegnum og vísað er til í liðnum *Um einstakar greinar frumvarpsins*.

Eins áður hefur komið fram þá teljum við að sú hagræðing sem sjúkratryggingastofnun ætli að ná fram með þessari breytingu falli á þjónustuveitendur. Óljóst er hver tilgangur og hvert umfang gagnasöfnunar er og getur verið óhagræðing fyrir þjónustuveitendur. Er það áfram skoðun TFÍ að skoðun gagna eigi að fara fram á þeim stað sem gögnin eru geymd.

Virðingarfyllt,
Fyrir hönd stjórnar Tannlæknafélags Íslands

Jóhanna Bryndís Bjarnadóttir
formaður TFÍ